



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՎԻՎ/123/2024

Ո Ր Ո Շ ՈՒ Մ

ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

ք. Երևան

24 մայիսի 2024թ.

Կոռուպցիայի կանխարգելման հանձնաժողովը, մասնակցությամբ Հանձնաժողովի անդամներ Մարիամ Գալստյանի (նիստը նախագահող), Արամայիս Փաշինյանի և Լիլիթ Ալեքսանյանի (այսուհետ՝ Հանձնաժողով), 2024 թվականի մայիսի 24-ին քննելով ՀՀ Արագածոտնի մարզի Ծաղկահովիտ համայնքի ղեկավարի տեղակալ Արա Միշայի Հովհաննիսյանի նկատմամբ Վարչական իրավախախտումների վերաբերյալ օրենսգրքի (այսուհետ՝ Օրենսգիրք) 169.28-րդ հոդվածի 5-րդ մասով նախատեսված զանցանքի հատկանիշներով առերևույթ խախտման կապակցությամբ հարուցված վարչական իրավախախտման վերաբերյալ թիվ ՎԻՎ/123/2024 գործը՝

ՊԱՐՉԵՑ

I. Վարչական իրավախախտման վերաբերյալ գործի վարույթի նախապատմությունը.

1.1 Հանձնաժողովը, ղեկավարվելով «Կոռուպցիայի կանխարգելման հանձնաժողովի մասին» օրենքի 25-րդ հոդվածի 1-ին մասի 2-րդ կետով սահմանված իրավակարգավորումներով, ինչպես նաև հիմք ընդունելով «Քաղաքացիական պայմանագիր» կուսակցության (այսուհետ՝ Կուսակցություն) 2022 թվականի տարեկան հաշվետվության

(այսուհետ՝ Կուսակցության տարեկան հաշվետվություն) ստուգման արդյունքում վերհանված տվյալները, իրականացրել է ՀՀ Արագածոտնի մարզի Ծաղկահովիտ համայնքի ղեկավարի տեղակալ Արա Միշայի Հովհաննիսյանի՝ 2023 թվականի դեկտեմբերի 14-ին ներկայացված 2022 թվականի պաշտոնատար անձի պաշտոնեական պարտականություններն ստանձնելու օրվա դրությամբ առկա գույքի, եկամուտների և շահերի հայտարարագրում, 2023 թվականի մայիսի 22-ին ներկայացված 2022 թվականի գույքի, եկամուտների, ծախսերի և շահերի տարեկան հայտարարագրում և 2024 թվականի ապրիլի 23-ին ներկայացված 2023 թվականի գույքի, եկամուտների, ծախսերի և շահերի տարեկան հայտարարագրում հայտարարագրված տվյալների ստուգում, որի արդյունքում պարզել է.

1.2 Արա Միշայի Հովհաննիսյանի կողմից 2023 թվականի դեկտեմբերի 14-ին ներկայացված 2022 թվականի պաշտոնատար անձի պաշտոնեական պարտականություններն ստանձնելու օրվա դրությամբ առկա գույքի, եկամուտների և շահերի հայտարարագրի (այսուհետ՝ Հայտարարագիր) «Ա. Ընդհանուր տվյալներ» բաժնի «Ա.2 Հայտարարատու պաշտոնատար անձի ընտանիքի անդամների մասին տվյալները» և «Ա.3 Հայտարարատու պաշտոնատար անձի հետ մերձավոր ազգակցությամբ կամ խնամհությամբ կապված համատեղ չբնակվող անձանց մասին տվյալները» ենթաբաժիններում տվյալներ հայտարարագրված չեն, մինչդեռ,

- 1) ՀՀ Արդարադատության նախարարության քաղաքացիական կացության ակտերի գրանցման գործակալության տվյալների շտեմարանում առկա տեղեկատվության համաձայն՝ 2022 թվականի հուլիսի 8-ին կատարվել է Արա Միշայի Հովհաննիսյանի և Վարդիթեր Հովհաննիսյանի ամուսնության պետական գրանցում:
- 2) Արա Միշայի Հովհաննիսյանի կողմից 2024 թվականի ապրիլի 23-ին ներկայացված 2023 թվականի գույքի, եկամուտների, ծախսերի և շահերի տարեկան հայտարարագրում ներկայացված տվյալների համաձայն՝ վերջինիս ընտանիքի անդամ են հանդիսանում Ֆաթմա Համբարյանը և Կարեն Հովհաննիսյանը:
- 3) 2024 թվականի մայիսի 22-ին վարչական իրավախախտման վերաբերյալ թիվ ՎԻՎ/142/24 արձանագրության կազմման ժամանակ վարույթի մասնակցի կողմից ներկայացված բացատրության համաձայն՝ վերջինիս հետ մերձավոր ազգակցությամբ

կամ խնամհույժամբ կապված համատեղ չբնակվող անձինք են եղբայրը, չափահաս զավակը, ամուսնու քույրը և ամուսնու ծնողները:

1.3 Ի պատասխան Հանձնաժողովի թիվ 01/1224/3-2024 գրության՝ 2024 թվականի մայիսի 7-ին վարույթի մասնակցի կողմից մուտքագրված թիվ Մ-2104-2024 գրությամբ ներկայացվել է պարզաբանում:

1.4 Հանձնաժողովը, Արա Միշայի Հովհաննիսյանի Հայտարարագրում չներկայացված տվյալների հիմքով Օրենսգրքի 169.28-րդ հոդվածի 5-րդ մասով նախատեսված զանցանքի հատկանիշներով վարչական իրավախախտման վերաբերյալ վարույթ նախաձեռնելու որոշման կապակցությամբ 2024 թվականի մայիսի 14-ին Արա Միշայի Հովհաննիսյանին հասցեագրել է թիվ 01/1534-2024 ծանուցումը՝ այն ստանալուց հետո՝ երրորդ օրը, ժամը՝ 11:00-ին հրավիրելով Հանձնաժողով վերոնշյալ առերևույթ խախտման վերաբերյալ վարչական իրավախախտման վերաբերյալ արձանագրություն կազմելու, իսկ հինգերորդ օրը, ժամը՝ 11:00-ին՝ առերևույթ իրավախախտման հիմքով կազմված արձանագրության և վերաբերելի նյութերի հիման վրա վարչական իրավախախտման վերաբերյալ գործի քննությանը մասնակցելու:

1.5 2024 թվականի մայիսի 22-ին վարույթի մասնակցի ներկայությամբ կազմվել է վարչական իրավախախտման վերաբերյալ թիվ ՎԻՎ/142/24 արձանագրությունը՝ Օրենսգրքի 169.28րդ հոդվածի 5-րդ մասով նախատեսված առերևույթ իրավախախտման հատկանիշով:

1.6 2024 թվականի մայիսի 24-ին գործի քննությունն իրականացվել է պատշաճ ծանուցված վարույթի մասնակցի բացակայությամբ, գործի քննությունը հետաձգելու միջնորդություն չի ներկայացվել:

II. Վարույթի մասնակցի ներկայացրած դիրքորոշում ու պարզաբանումներ

2.1 2024 թվականի մայիսի 7-ին մուտքագրված թիվ Մ-2104-2024 գրությամբ վարույթի մասնակիցը ներկայացրել է պարզաբանում (այսուհետ՝ Պարզաբանում) առ այն, որ 2022 թվականի նոյեմբերի 25-ին նշանակվել է Ծաղկահովիտ համայնքի ղեկավարի տեղակալի պաշտոնում և նշանակվելուց հետո Հանձնաժողով ներկայացրել է 2022 թվականի

պաշտոնեական պարտականություններն ստանձնելու և 2022 թվականի տարեկան հայտարարագրեր, որոնցում տեղյակ չլինելու պատճառով ընտանիքի անդամների տվյալները չեն ներառվել: 2023 թվականին տարեկան հայտարարագիրը լրացնելու ժամանակ գործընկերներից տեղեկացել է, որ ընտանիքի անդամների տվյալները հայտարարագրում ներառելը, ինչպես նաև նրանց կողմից հայտարարագիր ներկայացնելը պարտադիր է, որից հետո ընտանիքի անդամների վերաբերյալ տվյալները ներառվել են և ընտանիքի անդամների կողմից ներկայացվել են պահանջվող հայտարարագրերը (2023 թվականի տարեկան):

2.2 2024 թվականի մայիսի 22-ին վարչական իրավախախտման վերաբերյալ թիվ ՎԻՎ/142/24 արձանագրության կազմման ժամանակ վարույթի մասնակիցը ներկայացրել է բացատրություն (այսուհետ՝ Բացատրություն) առ այն, որ 2022 թվականի պաշտոնեական պարտականություններն ստանձնելու և 2022 թվականի տարեկան հայտարարագրերը ներկայացնելիս տեղյակ չի եղել, որ ընտանիքի անդամների տվյալները ևս անհրաժեշտ է ներկայացնել: Հետագայում, «Հանրային ծառայության մասին» օրենքը ուսումնասիրելուց հետո տեղեկացել է, որ անհրաժեշտ է ընտանիքի անդամների տվյալները լրացնել հայտարարագրերում և 2023 թվականի տարեկան հայտարարագրում լրացրել է պահանջվող տվյալները: Միտում չի ունեցել տվյալներ թաքցնելու, կատարված խախտումը չի մացության արդյունք է: Նշված հայտարարագրերի «Ա.3 Հայտարարատու պաշտոնատար անձի հետ մերձավոր ազգակցությամբ կամ խնամհությամբ կապված համատեղ չբնակվող անձանց մասին տվյալները» ենթաբաժնում մերձավոր ազգակցությամբ կամ խնամհությամբ կապված համատեղ չբնակվող անձանց մասին տվյալները չհայտարարագրելը ևս չի մացության արդյունք է: Միաժամանակ, հավելել է, որ իր հետ համատեղ չբնակվող անձինք են եղբայրը, չափահաս զավակը, ամուսնու քույրը և ամուսնու ծնողները:

Անդրադառնալով Կուսակցությանը նվիրատվություն կատարելու փաստին՝ նշել է, որ ոչ մի աղերս չունի այդ գումարի հետ, այդ չափով եկամուտ չի ստացել և տեղյակ չի եղել, որ իր անունից նվիրատվություն է կատարվել Կուսակցությանը: Հավելել է նաև, որ Կուսակցության անդամ է:

Միաժամանակ, հայտնել է, որ նշանակված գործի քննությանը չի ներկայանալու և խնդրել է այն անցկացնել իր բացակայությամբ՝ հիմք ընդունելով ներկայացված պարզաբանումը:

III. Վարույթի համար էական նշանակություն ունեցող փաստեր

Հանձնաժողովը, ուսումնասիրելով թիվ ՎԻՎ/123/2024 գործում առկա նյութերը, կատարել է հանգամանքների քննություն և հաստատված է համարում, որ՝

3.1 Արա Միշայի Հովհաննիսյանի կողմից 2023 թվականի դեկտեմբերի 14-ին ներկայացված 2022 թվականի պաշտոնատար անձի պաշտոնեական պարտականություններն ստանձնելու օրվա դրությամբ առկա գույքի, եկամուտների և շահերի հայտարարագրում (այսուհետ՝ Հայտարարագիր) «Ա. Ընդհանուր տվյալներ» բաժնի «Ա.2 Հայտարարատու պաշտոնատար անձի ընտանիքի անդամների մասին տվյալները» և «Ա.3 Հայտարարատու պաշտոնատար անձի հետ մերձավոր ազգակցությամբ կամ խնամիությամբ կապված համատեղ չբնակվող անձանց մասին տվյալները» ենթաբաժիններում տվյալներ հայտարարագրված չեն, մինչդեռ,

- 1) ՀՀ Արդարադատության նախարարության քաղաքացիական կացության ակտերի գրանցման գործակալության տվյալների շտեմարանում առկա տեղեկատվության համաձայն՝ 2022 թվականի հուլիսի 8-ին կատարվել է Արա Միշայի Հովհաննիսյանի և Վարդիթեր Հովհաննիսյանի ամուսնության պետական գրանցում:
- 2) Արա Միշայի Հովհաննիսյանի կողմից 2024 թվականի ապրիլի 23-ին ներկայացված 2023 թվականի գույքի, եկամուտների, ծախսերի և շահերի տարեկան հայտարարագրում ներկայացված տվյալների համաձայն՝ վերջինիս ընտանիքի անդամ են հանդիսանում նաև Ֆաթմա Համբարյանը և Կարեն Հովհաննիսյանը:
- 3) 2024 թվականի մայիսի 22-ին վարչական իրավախախտման վերաբերյալ թիվ ՎԻՎ/142/24 արձանագրության կազմման ժամանակ վարույթի մասնակցի կողմից ներկայացված բացատրության համաձայն՝ վերջինիս հետ մերձավոր ազգակցությամբ կամ խնամիությամբ կապված համատեղ չբնակվող անձինք են եղբայրը, չափահաս զավակը, ամուսնու քույրը և ամուսնու ծնողները:

IV. Որոշումն ընդունելու իրավական հիմքերը և հիմնավորումները.

4.1 ՀՀ Արագածոտնի մարզի Ծաղկահովիտ համայնքի ղեկավարի տեղակալ Արա Միշայի Հովհաննիսյանը «Հանրային ծառայության մասին» օրենքի (այսուհետ՝ Օրենք) 34-րդ հոդվածով սահմանված կարգավորումների համաձայն՝ հանդիսանում է գույքի, եկամուտների, շահերի և ծախսերի հայտարարագրման պարտականություն ունեցող անձ:

4.2 Օրենքի 39-րդ հոդվածի (Հայտարարագրում ներառվող ընդհանուր տվյալները սահմանող) 1-ին մասի 2-րդ կետի համաձայն՝ հայտարարագրում նշվում են հայտարարատու պաշտոնատար անձի ընտանիքի անդամի անունը, ազգանունը, հայրանունը, կապը հայտարարատու պաշտոնատար անձի հետ, ծննդյան օրը, ամիսը, տարին, անձնագրի տվյալները, հանրային ծառայությունների համարանիշը (առկայության դեպքում), քաղաքացիությունը, հասցեն, պաշտոնը (աշխատանքային գործունեությունը):

4.3 Նույն հոդվածի 1-ին մասի 3-րդ կետի համաձայն՝ հայտարարագրում նշվում են հայտարարատու պաշտոնատար անձի հետ մերձավոր ազգակցությամբ կամ խնամիությամբ կապված անձանց տվյալները՝ անունը, ազգանունը, հայրանունը, ծննդյան օրը, ամիսը, տարին, կապը հայտարարատու պաշտոնատար անձի հետ:

4.4 Նույն հոդվածի 2-րդ մասի համաձայն՝ սույն օրենքի իմաստով՝ հայտարարատու պաշտոնատար անձի հետ մերձավոր ազգակցությամբ կամ խնամիությամբ կապված անձինք են հայտարարատու պաշտոնատար **անձի ամուսինը, ծնողը, զավակը, եղբայրը, քույրը, ամուսնու ծնողը, զավակը, եղբայրը և քույրը:**

4.5 Օրենքի 34-րդ հոդվածի 6-րդ մասի համաձայն՝ հայտարարատու պաշտոնատար անձի՝ պաշտոնեական պարտականություններն ստանձնելու, դադարեցնելու հայտարարագրերը ներկայացվում են պաշտոնեական պարտականություններն ստանձնելու, դադարեցնելու օրվա դրությամբ: Տարեկան հայտարարագիրը ներկայացվում է յուրաքանչյուր տարվա հունվարի 1-ից՝ տվյալ տարվա դեկտեմբերի 31-ը ներառյալ ընկած ժամանակահատվածի համար:

4.6 Օրենքի 34-րդ հոդվածի 8-րդ մասի համաձայն՝ հայտարարատու պաշտոնատար անձի ընտանիքի չափահաս անդամները համարվում են հայտարարագիր ներկայացնելու

պարտականություն ունեցող անձ և հայտարարատու պաշտոնատար անձի հայտարարագրում լրացնում են իրենց գույքի, եկամուտների և ծախսերի վերաբերյալ տվյալները, պատասխանատու են դրանց իսկության համար:

4.7 Նույն հոդվածի 9-րդ մասի համաձայն՝ հայտարարատու պաշտոնատար անձի ընտանիքի անդամներն (ընտանիքի կազմի մեջ մտնող անձինք) են նրա ամուսինը, անչափահաս զավակը (այդ թվում՝ որդեգրված), հայտարարատու պաշտոնատար անձի խնամակալության կամ հոգաբարձության տակ գտնվող անձը, հայտարարատու պաշտոնատար անձի հետ համատեղ բնակվող յուրաքանչյուր չափահաս անձ:

4.8 Օրենսգրքի 169.28-րդ հոդվածի 5-րդ մասի համաձայն՝ հայտարարատուի կողմից հայտարարագրում **անզգուշությամբ սխալ կամ ոչ ամբողջական տվյալ** ներկայացնելը առաջացնում է տուգանքի նշանակում՝ սահմանված նվազագույն աշխատավարձի երկուհարյուրապատիկից չորսհարյուրապատիկի չափով:

4.9 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 1-ին մասի համաձայն՝ վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի հետ կապված հարաբերությունները կարգավորվում են Վարչական իրավախախտումների վերաբերյալ Հայաստանի Հանրապետության օրենսգրքով, ինչպես նաև «Վարչարարության հիմունքների և վարչական վարույթի մասին» Հայաստանի Հանրապետության օրենքով՝ հաշվի առնելով սույն օրենքով սահմանված առանձնահատկությունները:

4.10 «Վարչարարության հիմունքների և վարչական վարույթի մասին» օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.11 Օրենսգրքի 252-րդ հոդվածի համաձայն՝ մարմինն ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.12 Օրենսգրքի 244.17-րդ հոդվածի 1-ին մասի համաձայն՝ Օրենսգրքի 169.28-րդ հոդվածով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում Հանձնաժողովը:

4.13 Օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝ 1) վարչական տույժ նշանակելու մասին, 2) գործի վարույթը կարճելու մասին:

4.14 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 3-րդ մասի համաձայն՝ Հանձնաժողովը Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի արդյունքում ընդունում է որոշումներ, որոնք կարող են բողոքարկվել «Վարչարարության հիմունքների և վարչական վարույթի մասին» Հայաստանի Հանրապետության օրենքին համապատասխան՝ դատական կարգով:

Սույն գործով հաստատված փաստական հանգամանքների նկատմամբ կիրառելի իրավական նորմերի վերլուծության արդյունքում Հանձնաժողովն արձանագրում է.

Օրենքով սահմանված հայտարարագրման ենթակա տվյալներին վերաբերող իրավակարգավորումներով սահմանված պահանջներն ամբողջական կերպով ներկայացված են նաև հայտարարագրերի լրացման էլեկտրոնային համակարգում, որտեղ հայտարարատուի կողմից լրացվում են Օրենքով պահանջվող վերաբերելի տվյալները: Մասնավորապես, հայտարարագրում ներառվող ընդհանուր տվյալների դեպքում՝ հայտարարատու պաշտոնատար անձի ընտանիքի անդամի անունը, ազգանունը, հայրանունը, կապը հայտարարատու պաշտոնատար անձի հետ, ծննդյան օրը, ամիսը, տարին, անձնագրի տվյալները, հանրային ծառայությունների համարանիշը (առկայության դեպքում), քաղաքացիությունը, հասցեն, պաշտոնը (աշխատանքային գործունեությունը) և այլ տեղեկություններ:

Հանձնաժողովի 2020 թվականի նոյեմբերի 12-ի N 04-Ն որոշմամբ սահմանվել են հայտարարագրի ներկայացման և հայտարարագրված տվյալներում փոփոխություն կատարելու կարգը, հայտարարագրի լրացմանը ներկայացվող պահանջները:

Առաջնորդվելով նշված որոշմամբ սահմանված հայտարարագրի լրացմանը ներկայացվող պահանջներով՝ Հանձնաժողովը հայտարարագրերի լրացման կարգի խախտում է որակում այն դեպքերը, երբ հայտարարագրման **ենթակա տվյալը** լրացվել է սխալ ենթաբաժնում: Այն դեպքում, երբ հայտարարատուի ներկայացրած տվյալին վերաբերող որևէ տվյալ չի լրացվում համապատասխան դաշտում և լրացվում է այլ ենթաբաժնում՝ հայտարարատուն թույլ է տալիս հայտարարագրի լրացման կարգի պահանջների խախտման արարք, մինչդեռ, Օրենքով պահանջվող **հայտարարագրման ենթակա առանձին տվյալները չներկայացնելու կամ սխալ ներկայացնելու դեպքում՝ թույլ է տալիս ոչ ամբողջական կամ սխալ տվյալների ներկայացման արարք:**

Սույն գործով ՀՀ Արագածոտնի մարզի Ծաղկահովիտ համայնքի ղեկավարի տեղակալ Արա Միշայի Հովհաննիսյանը Հայտարարագրում **անզգուշությամբ** ներկայացրել է հետևյալ ոչ ամբողջական տվյալները.

Հայտարարագրի «Ա. Ընդհանուր տվյալներ» բաժնի «Ա.2 Հայտարարատու պաշտոնատար անձի ընտանիքի անդամների մասին տվյալները» ենթաբաժնում տվյալներ հայտարարագրված չեն վերջինիս ընտանիքի անդամների՝ կնոջ՝ Վարդիթեր Հովհաննիսյանի, Ֆաթմա Համբարյանի և Կարեն Հովհաննիսյանի վերաբերյալ, իսկ «Ա.3 Հայտարարատու պաշտոնատար անձի հետ մերձավոր ազգակցությամբ կամ խնամհուությամբ կապված համատեղ չբնակվող անձանց մասին տվյալները» ենթաբաժնում՝ պաշտոնատար անձի հետ մերձավոր ազգակցությամբ կամ խնամհուությամբ կապված համատեղ չբնակվող անձանց՝ եղբոր, չափահաս զավակի, ամուսնու քրոջ և ամուսնու ծնողների վերաբերյալ:

Հաշվի առնելով արձանագրված իրավախախտման նկատմամբ կիրառելի իրավական նորմերի պահանջները՝ սույն գործով առկա փաստերից հետևում է, որ Արա Հովհաննիսյանը Հայտարարագրում անզգուշությամբ ներկայացրել է ոչ ամբողջական տվյալներ, որի արդյունքում թույլ է տրվել Օրենսգրքի 169.28-րդ հոդվածի 5-րդ մասով սահմանված արարք:

Խախտման հիմքով պատասխանատվություն սահմանելու հարցը որոշելու համար Հանձնաժողովը գտնում է, որ անհրաժեշտ է յուրաքանչյուր գործով գնահատել, արդյո՞ք տվյալ խախտումը հանգեցրել է նորմով պաշտպանվող իրավահարաբերությունների խաթարմանը: Այս առնչությամբ էական է խախտման (արարքի) որակական կողմը:

Արարքի որակական կողմը գնահատելիս անհրաժեշտ է հաշվի առնել՝ արդյո՞ք արարքը կարող է պարունակել Օրենսգրքով սահմանված արարքի հատկանիշներ և այնպիսի էական վնաս չի պատճառել ֆիզիկական կամ իրավաբանական անձին, հասարակությանը, պետությանը, որի հիմքով սահմանված պատասխանատվությունը կդիտարկվի համաչափ:

Անդրադառնալով վարույթի մասնակցի դիրքորոշմանն առ այն, որ տեղյակ չլինելու պատճառով ընտանիքի անդամների, ինչպես նաև մերձավոր ազգակցությամբ կամ խնամիությամբ կապված համատեղ չբնակվող անձանց տվյալները չեն ներառվել Հայտարարագրում, Հանձնաժողովն անհրաժեշտ է համարում ընդգծել այն իրողությունը, որ օրենսդիրը սահմանել է պարտադիր ներկայացման ենթակա տվյալների շրջանակը հաշվետու ժամանակահատվածի համար՝ հաշվի առնելով այն հանգամանքը, որ հայտարարագրում թվարկված տվյալների ներկայացման միջոցով սպառիչ և ամբողջական կերպով արտացոլվում են ինչպես հայտարարատու պաշտոնատար անձի, այնպես էլ նրա ընտանիքի անդամների և մերձավոր ազգակցությամբ կամ խնամիությամբ կապված համատեղ չբնակվող անձանց վերաբերյալ անհրաժեշտ տվյալները: Մասնավորապես, Օրենքի 39-րդ հոդվածի 1-ին մասի 2-րդ կետով սահմանված իրավակարգավորման համաձայն՝ հայտարարագրում նշվում են հայտարարատու պաշտոնատար անձի ընտանիքի անդամին վերաբերելի այն տվյալները, որոնք ենթակա են պարտադիր ներկայացման, իսկ Օրենքի 34-րդ հոդվածի 8-րդ մասով սահմանված իրավակարգավորման համաձայն՝ հայտարարատու պաշտոնատար անձի ընտանիքի չափահաս անդամները համարվում են հայտարարագիր ներկայացնելու պարտականություն ունեցող անձ և հայտարարատու պաշտոնատար անձի հայտարարագրում լրացնում են իրենց գույքի, եկամուտների և ծախսերի վերաբերյալ տվյալները, պատասխանատու են դրանց իսկության համար:

Միաժամանակ, Օրենքի 39-րդ հոդվածի 1-ին մասի 3-րդ կետով սահմանված է այն անձանց շրջանակը, որոնք հայտարարատու պաշտոնատար անձի հետ համատեղ չեն

բնակվում, սակայն հանդիսանում են Օրենքի իմաստով պաշտոնատար անձի հետ մերձավոր ազգակցությամբ կամ խնամհությամբ կապված անձինք, և պաշտոնատար անձը կրում է վերջիններիս վերաբերյալ իր կողմից ներկայացվող հայտարարագրում տվյալներ ներկայացնելու պարտականություն: Նշված անձանց շրջանակում ընդգրկված են հայտարարատու պաշտոնատար **անձի ամուսինը, ծնողը, զավակը, եղբայրը, քույրը, ամուսնու ծնողը, զավակը, եղբայրը և քույրը:**

Սույն գործով էական հանգամանք է այն, որ Արա Հովհաննիսյանի կնոջ՝ Վարդիթեր Հովհաննիսյանի, ընտանիքի մյուս անդամների՝ Ֆաթմա Համբարյանի ու Կարեն Հովհաննիսյանի, ինչպես նաև վարույթի մասնակցի հետ մերձավոր ազգակցությամբ կամ խնամհությամբ կապված համատեղ չբնակվող անձանց վերաբերյալ տվյալներն առհասարակ բացակայում են Հայտարարագրի «Ա. Ընդհանուր տվյալներ» բաժնում:

Տվյալ պարագայում, Հանձնաժողովն էական է համարում այն հանգամանքը, որ Արա Հովհաննիսյանի կողմից նշված բաժնում տվյալների չհայտարարագրման փաստով պայմանավորված՝ վերջինիս ընտանիքի անդամների, ինչպես նաև իր հետ մերձավոր ազգակցությամբ կամ խնամհությամբ կապված համատեղ չբնակվող անձանց վերաբերյալ տվյալները դուրս են մնում Հանձնաժողովի տեսադաշտից և հետևաբար, Հանձնաժողովի համար դառնում են անվերահսկելի, քանի որ որպես պարտադիր հայտարարագրման ենթակա առանձին և ինքնուրույն տվյալներ Հանձնաժողովի համար՝ չներկայացման պարագայում անհասանելի են:

Ավելին, բացառապես հայտարարատու պաշտոնատար անձի կողմից նշված բաժիններում տվյալների ներկայացման միջոցով են Օրենքի 39-րդ հոդվածում թվարկված՝ Օրենքի իմաստով ընտանիքի անդամ հանդիսացող անձինք հայտարարագրերի լրացման էլեկտրոնային համակարգում նույնականացվում և կախված հայտարարատու պաշտոնատար անձի հետ կապի բնույթից, տարիքից և օրենքով սահմանված այլ առանձնահատկություններից՝ ձեռք բերում հայտարարագիր ներկայացնելու ինքնուրույն պարտականություն կրող անձի կարգավիճակ, իսկ թվարկված մյուս անձինք՝ հայտնվում Հանձնաժողովի տեսադաշտում:

Հաշվի առնելով այն հանգամանքը, որ վարույթի մասնակցի՝ Բացատրությամբ ներկայացված դիրքորոշման համաձայն՝ վերջինս Կուսակցությանը նվիրատվություն չի կատարել և այդ չափով եկամուտ չի ստացել, սույն գործով վարույթի մասնակցի ընտանիքի անդամների, ինչպես նաև վերջինիս հետ մերձավոր ազգակցությամբ կամ խնամիրությամբ կապված անձանց վերաբերյալ ճիշտ և ամբողջական տվյալների առկայությունն առավել էական նշանակություն ունի վերջիններիս կողմից ստացված եկամուտներից նշված գումարի չափով նվիրատվությունը կատարելու հնարավորության համատեքստում: Այս առումով, Հանձնաժողովն անհրաժեշտ է համարում ընդգծել, որ այս կերպ գործնականում խաթարվում է հանրային հաշվետվողականությունը, հայտարարագրված տվյալների ամբողջականության համադրման հնարավորությունը՝ պաշտոնատար անձի կողմից օրինական համարվող ծագման աղբյուրից ստացված եկամուտներից Կուսակցությանը նվիրատվություն կատարելու հնարավորության բացահայտման առումով: Այսպիսով, ելնելով վերոնշյալից՝ Հանձնաժողովն արձանագրում է, որ որպես ընտանիքի անդամ անձի տվյալը չներկայացնելու դեպքում, ընտանիքի անդամը փաստացի հայտարարագիր չի ներկայացնում և Հանձնաժողովը զրկվում է տվյալ պաշտոնատար անձի և օրենքի համատեքստում ընտանիքի անդամների ընդհանուր գույքային դրության վերաբերյալ համապարփակ վերլուծություն կատարելու հնարավորությունից:

Անդրադառնալով վարույթի մասնակցի Բացատրությանն առ այն, որ ինքը Կուսակցությանը նվիրատվություն չի կատարել և տեղյակ չի եղել, որ իր անունից նվիրատվություն է կատարվել Կուսակցությանը, Հանձնաժողովն արձանագրում է, որ վերոնշյալ հարցի քննարկումը դուրս է սույն վարույթի առարկայի շրջանակից և անհրաժեշտ է համարում լրացուցիչ ուսումնասիրության կատարման արդյունքում անդրադառնալ վերոնշյալի առնչությամբ իրավասու մարմնին հաղորդում ներկայացնելու հարցին:

Վերոնշյալի համատեքստում, Հանձնաժողովն արձանագրում է, որ Օրենսգրքի 169.28-րդ հոդվածը նպատակ է հետապնդում ապահովել պետական պաշտոն զբաղեցնող անձի (ինչպես նաև վերջինիս ընտանիքի անդամի) հանրային հաշվետվողականությունը, վերջինիս հանրային գործունեության նկատմամբ վստահությունը, պետական պաշտոն զբաղեցնող անձի (վերջինիս ընտանիքի անդամի) գործունեության թափանցիկությունը և հնարավոր

կոռուպցիոն դրսևորումների բացահայտումն ու դրանց նկատմամբ հանրային վերահսկողությունը:

Միաժամանակ, հաշվի առնելով, որ Օրենսգրքի 169.28-րդ հոդվածի 5-րդ մասով սահմանված արարքի համար նախատեսված է վարչական պատասխանատվության ոչ հստակ սահմանաչափ (**տուգանքի նշանակում՝ սահմանված նվազագույն աշխատավարձի երկուհարյուրապատիկից չորսհարյուրապատիկի չափով**), Հանձնաժողովն արձանագրում է, որ Օրենսգրքի 169.28-րդ հոդվածի 5-րդ մասով վարչական տույժ կիրառելիս պետք է հաշվի առնել ինչպես խախտման բնույթը, այնպես էլ պատասխանատվությունը ծանրացնող կամ մեղմացնող հանգամանքները:

Հանձնաժողովն արձանագրում է, որ սույն գործով վարչական վարույթի մասնակցի գործողություններում առկա չէ Օրենսգրքի 33-րդ հոդվածով սահմանված վարչական իրավախախտման համար պատասխանատվությունը մեղմացնող, ինչպես նաև Օրենսգրքի 34-րդ հոդվածով սահմանված վարչական իրավախախտման համար պատասխանատվությունը ծանրացնող որևէ հանգամանք:

Ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, 24-րդ հոդվածի 1-ին մասի 6-րդ կետով, 26-րդ հոդվածով, Օրենսգրքի 169.28-րդ հոդվածի 5-րդ մասով, 244.17-րդ հոդվածի 1-ին մասով՝ Հանձնաժողովը

Ո Ր Ո Շ Ե Ց

1. ՀՀ Արագածոտնի մարզի Ծաղկահովիտ համայնքի ղեկավարի տեղակալ Արա Միշայի Հովհաննիսյանի նկատմամբ կիրառել վարչական տույժ սահմանված նվազագույն աշխատավարձի երկուհարյուրապատիկի՝ **200 000** (երկու հարյուր հազար) ՀՀ դրամի չափով:

2. Տուգանքը պետք է վճարվի իրավախախտողի կողմից գանձապետական 900005001335 «Իրավախախտումների համար կիրառվող վարչական տուգանքներ և

պատժամիջոցներ» հաշվեհամարին՝ վճարման անդորրագրի «նպատակ» դաշտում **պարտադիր նշելով սույն որոշման համարը:**

3. Սույն որոշումն ուժի մեջ է մտնում Արա Միշայի Հովհաննիսյանին այն սահմանված կարգով հանձնելու (հանձնված համարվելու) հաջորդող օրվանից:

4. Սույն որոշումն ուժի մեջ մտնելուց հետո ՀՀ Արագածոտնի մարզի Ծաղկահովիտ համայնքի ղեկավարի տեղակալ Արա Միշայի Հովհաննիսյանին տրամադրել եռօրյա ժամկետ հայտարարագրերի համապատասխան բաժնում ուղղումներ կատարելու համար:

5. Սույն որոշումը կարող է բողոքարկվել ՀՀ օրենսդրությամբ սահմանված կարգով և ժամկետում:

ՀԱՆՁՆԱԺՈՂՈՎԻ ՆԱԽԱԳԱՀԻ

ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝

ՄԱՐԻԱՄ ԳԱԼՍՅԱՆ